

Autoridad a confisca e arma caba!

CUATER PERSONA DETENI DEN CASO ASESINATO DI TURISTA

ORANJESTAD (AAN): E caso di asesinato di e turista riba Diasabra madruga cu a pasa, a laga pueblo preocupa pa 1 siman largo!

Pero comunidad lo a hala rosea fuerte ora cu Recherche a ricibi varios tip, den cual tabatin "uno di oro". Compilando tur e informenan cu tabata drenta, esakinan a worde poni hunto pa asina delibera cu otro pa dal man riba esnan cu a haci nan mes culpable pa e crimen cometi riba e turista Mericano Suzan McCormick di Hampton Bay, New York.

Mientras tanto seguramente Interpol a notifica canalnan oficial na Merca cu tin tres sospechoso deteni. Esaki pa contradeci cu Cuerpo Policial Arubano sa di soluciona caso-nan, como cu e impresion aki a worde crea.

Ayera Comisario Rasmijn a confirma cu detencion a cay y durante di e conferencia di prensa e di 4 persona tambe lo a worde deteni.

Ta asina cu siman pasa Aruba a ricibi un shock ora cu a drenta informe despues cu e turista cu a worde haya herida, no tabata trata aki di un Hit and Run, manera esaki tabata mustra na prome instancia.

E caso aki a duna autoridadnan concerni dolor di cabez. Unda pa cuminsa, primeramente, a busca informe na e Hotel caminda e victima tabata hospeda. Contacto a worde tuma cu famia di e fayecido pa pone nan altura di e sucedido.

Mientras autoridad ta sperando riba e miembronan di famia, Mando Policial encabeza pa Josefa a laga forma un team encabeza pa hefe di recherche seccion Balashi sub oficial Matheo. E ultimo a encarga sr. Orlando Rasmijn forma un team di mas recherche.

Nan no a sinta keto y a subi caya, mientras e otro coleganan ta keda standby na oficina. Dianan ta pasa varios yamada ta drentando, algun di e informenan tabata cuadra cu otro relaciona cu cierto vehiculo.

Mientras ta buscando mas detaye relaciona cu e informe riba un vehiculo... e minuutnan tabata pasando y mas esfuerso a wordz haci pa yega pa soluciona e caso.

Miembronan di recherche cu no ta trahando cu e team

tambe ta suministra informenan cu na ta ricibi na nan coleganan.

Poniendo tur informe nan hunto a saca conclusion cu nan ta yegando cerca di e sospechosonan.

Tabata den curso di Diahuebs cu e prome sospechoso a worde treci aden. Ora cu a tira cierto cartanan riba mesa, aparentemente 'lenga a cuminsa los'.

Mientras dos otro brother tambe a worde treci aden, pa asina forma un trio di sospechoso cu nan no tabatin salida mas pa basha abao formalmente.

LOKE A PASA

E anochi di e crimen e trio tabata na RCA caminda tabata tin un eleccion di Reina Juvenil di Carnaval.

Posiblemente djis despues of prome cu e actividad termina, nan a sali bay den un V-auto. Awor ta bini e pregunta con bini nan cu V auto ya cu ningun di tres tin 23 aña manera compania sa exigi un persona mester tin. Parce e vehiculo aparentemente lo a worde alquila pa un tercer persona y sea a presta of fia un di e nan e auto. Esaki investigacion cu ainda no a termina lo saca afor.

Den e auto tabata tin e tres jovennan Ryan L. di 15 aña, Raul C. di 18 aña y Irlo L.V. di 19 aña.

Tur e tres personanan aki ta bini for di distrito di Oranjestad (Dakota). Supuestamente Raul C. ta esun cu a tira, y luna pasa el a sali for di prison di KIA.

Door di kende y con e plan a worde traha tabata dificil pa autoridadnan por a duna informe.

Na momento cu e turista tabata cana, un di nan segun su mes declaracion Raul C. lo a usa e arma pa atraca "Suzan". Posiblemente nervio a pone actua di tal forma cu el a ranca e "trigger" (gai) cu consecuentemente e bala a sali y a herida Suzan mortalmente.

Mesora despues cu e tiro lo a cay e trio a bandona e sitio lagando e victima atras, cu tur su pertenencia. E arma segun informe nan lo a duna un persona esaki, pa cual ayera durante di e investigacion a detene un tal E.B. figurabo di 40 aña di edad.

E.B. lo a cambia e arma cu



un di e sospechosonan pa cos di balor y a ser menciona cu e arma a ser cumprá cerca Santana cu algun siman pasa a wordo asesina na Sero Blanco. Un di e acusadonan lo ta sobrino di E.B.

E ARMA

Mientras tanto e arma a worde confisca, segun DIARIO a compronde. Tabata trata di un di caliber

38. Comisario Rasmijn tabata tin palabra di elogio pa esnan cu a logra di soluciona e caso, den mes un rosea tambe e gradici comunidad cu tambe a duna un man pa trece claridad.

E ta lamenta cu aki ta trata di jovennan cu nan edad ta varia di 15 pa 19 aña. E daño cu e jovennan a causa tanto Aruba y nan famia... ta grandi.

Awor ta verbaal nan lo tin cu pone den otro pa asina presenta e caso aki den corte di justicia.

Por bisa cu e caso aki den un tempo relativamente corte a worde soluciona. Un palabra di elogio di parti di DIARIO ta bay na cuerpo Policial cu a sabi di trece un claridad den un caso masha penoso cu a herida parti di nos turismo y a shock nos comunidad.

GUARDIANAN DI GOBERNADOR A DETENE COLOMBIANO CU DROGA

ORANJESTAD (AAN): Guardianan encarga cu seguridad di Gobernador a detene un Colombiano. Ta asina cu e personal a tuma nota di un homber sospechoso cu ta cana den vecindario.

Pa colmo e homber tabata bao di influencia. Mesora e personal a drenta den accion

y a detene e homber aki. Mientras tanto Polis a worde notifica di e sucedido. Den un minimo di fraccion di tempo un Patruya a presenta y e guardianan a entrega esaki na Polis.

Tabata trata di un homber Colombiano, di inicial D.R.R.B. di 37 aña di edad.

Un control cu nan a haci, a

pone cu nan a haya den su saco di carson, un pida foil basta grandi. Den e foil tabatin substancia parecido na Cocaína.

Na Warda di Polis el a worde cera y despues cu su wayaba pasa, personal despacha di droga lo sigui cu interogacion.

ALBO TA SIGI AZOTA SANTA MARTHA CU STOF

ORANJESTAD (AAN): Habitantenan di Santa Martha cu a kere cu awor gobierno por fin lo bay tuma medida contra e molester di stof cu Albo ta causa, a kiboca nan mes pa di tantisimo biaha.

Durante e siman cu a pasa aki, Albo a masha hopi stof mes riba e barionan di Santa Martha. Wayaca y Simeon Antonio.

Albo te awe no por a mustra

ningun sorto di permit pa por opera na Santa Martha pero gobierno aparentemente mester tolera Albo pasobra te awe nan no a actua contra Albo cu ta funcccionando contra ley.

Na Aruba Ley no ta conta pa tur hende y segun habitantenan di Santa Martha esaki un biaha mas tabata bisto durante siman cu a pasa.

Casnan a keda blanco di stof, muchanan a haya

problema cu respiracion etc etc.

Stof di cement y asfalt ta mata hende y dentro di poco nan lo haya stof di glas tambe riba nan dak pa asina caba di completa e asunto.

Otro siman habitantenan di Santa Martha y Wayaca lo bay cuminsa saca informacionnan cayente encuanto e problema di stof na Santa Martha.